

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Ei te ture, ei te parau, ta ratou e imi; ia ore ia faaau i ta ratou parau i taua parau ra, no te pouri ia i na reira'i ratou ra.” Isaia 8: 20.

Nu. 9.

Setepa, 1913.

Mat. 6.

Te Monoraa i te Aposetoloraa Matamua.

Mai Tei Haapiihia e te Ekalesia Katolika Roma.

U A fariihia te Ekalesia Katolika Roma ei te ekalesia cherisetiano tahito i roto i te ao atoa nei. Ua haamata hoi to'na parau tuatapapa i te anotau no Petero, e ua parauhia oia ei to ratou peata matamehai ra. Te parau noa ra ratou e, ua horoa'tura Petero i to'na mana i to ratou pope matamua i te oire ra i Roma, e i nia iho i taua parau ra i haamauhia'i ta ratou parau i te monoraa i te Aposetoloraa matamua. Mai te mea e tia ia haamau-papu-hia teie nei faaroo, oia hoi, ua rave mau Petero i taua ohipa faufaa rahi ra, e ua vai hoi to'na mana i ô ratou ra e tae noa mai i teie nei â tau, e faaiteraa papu ia te reira e, tei ia ratou te mana mau, e o to ratou ia te Ekalesia mau na te Atua. Area râ, mai te mea e tia ia faaite-mau-hia e, ua rahi te mau mea taupupu, e te mau haafifîraa i teie nei faaroo, i roto i te parau i papaihia ra, e faaiteraa ia te reira e, eita e nehenehe ia farii vave tatou i te mau parau e te mau haapiiraa na taua ekalesia puai rahi ra.

Ua iti roa hoi te mau mea i itehia no te mau ohipa i ravehia e te Feia Mo'a tahito ra, e ua iti roa tei itehia no ratou i te taime i tapeahia'i Petero i roto i te fare auri i Roma. Aita i papu, mai te mea ua maiti anei Petero i to'na mono i mua'e i to'na taparahi-raa-hia, e aore râ aita. Ua ite oia e, eita e mahia e faarue ai oia i teie nei ao, e no reira i tupu te mana'o i roto i te mau taata e, ahiri aita e hoê i reira, tei mau noa ra i te mana e au i to Petero iho, e o tei tia roa ia'na ia rave i te ohipa rahi no te faatereraa i te ekalesia ra, ua haapao ihora hoi Petero i te ohipa maitiraa i to'na ra mono. Tei ia tatou te parau tuatapapa no te faatoroaraa i te na Aposetolo matamua e hoê ahuru ma piti ra. Tei ia tatou atoa te parau tuatapapa no te faatoroaraa ia Matatia, o tei riro ei mono ia Iuda, o tei taiva i te ekalesia; e no te faatoroaraa ia Paulo raua o Baranaba i te Aposetoloraa; e no te faatoroaraa ia Timoteo ei Episekopo, aita roa râ ta tatou e parau tuatapapa no te faatoroaraa o Petero i te pope matamua, o Linus episekopo to'na i'oa, e mai te mea aita i tia i te ekalesia Roma ia faaite mai i te reira huru parau tuatapapa, e te mana'o nei matou e, aita i tia, eireira e mea faufaa ore ta'na parau i te monoraa i te Aposetoloraa matamua, e ua haavare hoi to'na tiaraa.

Ua tupu to Petero taparahi-raa-hia i te matahiti 65, e aore râ e 66, e i taua taime ihora, te ora noa ra te mau Aposetolo atoa, maori râ o Iakobo, e aita roa te hoê no ratou i vaiiho i te tahi parau tuatapapa no te maitiraa i te hoê mono. Ua papai ihora te Aposetolo ra o Ioane i na episetole e toru, e toru ahuru matahiti i muri a'e i to Petero poheraa, e aita roa oia i faahiti i te hoê parau no te faatoroaraa i te hoê taata ei aratai no te ekalesia. E toru ahuru matahiti i muri a'e i te poheraa no Petero, papai ihora Ioane i ta'na mau heheuraa, oia hoi te buka Apokalupo, mai te ore i papai i taua mea faufaa rahi ra; ua faahapa puai noa râ oia i te ekalesia no Roma ei aneti-Mesia. Ua papai ihora Petero i ta'na episetole piti i te tau toetoe no te matahiti 65-6, no te

mea ua pohe oia i te 22, e aore râ i te 24 no Febuare, i te matahiti 66, e i roto i taua episetole ihora, aore roa oia i faahiti i te parau no te faatoroaraa i te tahi atu taata i taua toroa rahi ra. Ua papaihia hoi te episetole na Iuda i te matahiti 66 i muri mai i te Mesia, e aita'toa oia i faaite i taua mea ra.

Ua papaihia ta Paulo episetole piti ia Timoteo i Roma, i te matahiti 66, a tapea-noa-hia'i oia e Petero atoa i roto i te fare auri, e ua rahi hoi te mau mea te faaite papu e, ua tapeahia raua e piti i roto i te fare auri hoê i te tahi taime maoro. Ua ite-papu-hia e, ua na mua Petero i te pohe ia Paulo, e no reira e ere anei ia te mea tia, i taua huru taime ra, a fatata roa'i oia i te taparahihia, ia faahiti Paulo, o oia te hoê hoa tîtî no Petero, i te tahi parau no te faatoroaraa i te hoê taata, ei aratai, e ei upootia no te ekalesia ra? Area râ, faaaraara noa'tura oia ia Timoteo i te mau orometua haavare; e mai te au i ta'na episetole piti ia Timoteo, parau atura Paulo e, ua faaruehia ihora oia e ta'na ra mau taeae, e o Luka ana'e ra tei pihaiho ia'na ra. Ua faaite atura oia ia Timoteo ia haapeepe mai ia tae vave mai oia ia'na, e ia aratai atoa mai ia Mareko. Ihea râ Petero i reira? Ua papu roa e, mai te mea aita Petero i pihaiho ia Paulo, ua pohe roa oia, e aore râ aita roa i tia ia Paulo ia parau e, "O Luka ana'e ra teie ia'u nei." Ua tairuru atura o Paulo, e o Luka, e o Mareko, e tootoru no te Aposetoloraa, i Roma, i muri iti a'e i to Petero poheraa; e teie nei, ahiri i faatoroa Petero i te hoê taata ei to'na mono, ua papu roa e, e faaite hoi te hoê no teie nei na taata i taua mea ra; aita roa râ ratou i na reira. E ahiri i maiti na hoi Petero i te hoê ei mono no'na, aore roa i tia ia Paulo ia parau e, "O Luka ana'e ra teie ia'u nei," no te mea ei reira'toa te taata i maitihia, e o Luka atoa hoi.

Tei te episetole piti na Petero te tahi na irava parau faufaa rahi. Te na ô mai nei oia: "Te mana'o nei hoi au, e mea tia to'u parahiraa i teie nei tiahapa, ia faaaraara'tu

ia outou, i te faaiteite-faahou-raa'tu â; ua itea hoi e ua fatata vau i te haapae i teie nei tiahapa, ta to tatou Fatu ta Iesu Mesia i faatia mai ia'u ra. E e faaitoito â hoi au ia vai maite â teie nei mau parau i roto i to outou mana'o ia reva ê au ra." Petero II, 1: 13-15. Na teie nei parau i faaite papu mai e, ua opua ihora Petero ia haapao i te tahi ravea na te ekalesia, e mai te mea aita oia i pohe ia papai atura Paulo ia Timoteo, i te faaiteraa'tu ia'na e, o Luka ana'e tei pihaiho ia'na ra, e mai te ani atu ia'na ia aratai atoa mai ia Mareko, ua papu roa e, ua na reirahia, oia hoi ua papai atura Paulo, ia tia ia Petero ia faaite atu i te tahi mau mea ia ratou no te faatereraa i te ekalesia, a parahi ai ratou i pihaiho ia'na ra. Area râ, mai te mea ua pohe roa Petero i reira, mai tei faaite-papu-hia e te parau na Paulo, i faaite na hoi oia i teie nei mau mea ia Paulo, e te anaanatae noa ra hoi Paulo ia faaite atu i te reira ia Luka e ia Mareko, no te mea ua ite oia e, ua fatata roa'toa hoi to'na iho poheraa. Ahiri i maiti, e i faatoroa Petero i to'na mono, ua ite tatou e, e papai mau te hoê no teie nei na Aposetolo i taua mea ra; ua papu roa râ e, aore roa Petero i na reira. O Petero ia te upootia, e tei ia'na te mau taviri e te mau mana no te basileia; aita râ e nehenehe ia parau noa te tahi mau taata e, tei ia ratou atoa taua mau mana ra, e no te mea e, ua mau Petero i te reira, e ere ia e faaiteraa e, tei ia ratou mau te mau taviri e te mau mana i horoahia na Petero e te mau Aposetolo atoa. Ua itehia, e ua faatiahia e, te tia noa ra o Iakobo raua o Ioane i muri iho ia Petero i roto i te Aposetoloraa mo'a ra; ua pohe hoi Iakobo, e o Petero, e o Paulo, e no reira tei te mau Aposetolo i toe mai te mau mana no te basileia, e o Ioane ia to ratou upootia.

I roto i te matahiti 90, e piti ahuru ma maha matahiti i muri a'e i te poheraa no Petero, papai ihora Ioane i te hoê episetole i to te ekalesia paatoa, i te faaiteraa'tu e, tei ia'na te mana, e oia ia te upootia no te ekalesia. I taua tau ihora, oia hoi i te matahiti 90 i muri mai i te Mesia, i maiti na hoi te Katolika Roma i na pope e piti, te tahi i muri i te tahi, mai poheraa no Petero mai, o Linus e o Anacletus ia to raua na i'oa. Aita roa tatou i ite ia raua i te ite-raa-hia e te Aposetolo ra e Ioane, area râ te faahapa noa atura oia i te ekalesia i Roma ei aneti-Kirito.

(E tuatihia mai teie parau.)

Te Parau Tuatapapa no Iosepha Semita.

(Tuatiraa.)

PENE XXXVI.

Matahiti 1843.

Ua tohukia e, e tupu te hoê tama'i rahi roa. Ta te Peropbeta paraparauraa ia Setephano A. Dougalasa. Te hoê tohuraa. Te ravea tiretiera (ravea no te ra'i) no te faaipoiporaa. Ua haruhia Iosepha, e hamani-ino-hia ihora. Ua farii aroha maira oia i te mau taata, o tei tamata i te taparahi ia'na.

[A faatiamâ te haavâ ra o Pope ia Iosepha, i roto i te haavâraa i Sipiringafiela, i te 5 no Tenuare, 1843, ua pee na muri maira te tahi na ava'e no te hau, e te peapea ore. E taime oaoa rahi teie no te Peropbeta— e taime i parauhia'i e ana te mau tohuraa e rave rahi, e i haapii-hua-hia'i te parau mau i te Feia Mo'a. I te pae matamua no teie nei matahiti, faatupuhia a'era te aehuehu rahi no te tohuraa a te hoê taata, o Milera to'na i'oa, o tei parau e, e haere mai Iesu, e e haapaohia te mahana haavâraa rahi i te 3 no Eperera. Ua haere maira te hoê pûpû taata apî no Niu Ioka mai e paraparau ia Iosepha no teie nei mea, e parau papu atura Iosepha ia ratou e, e ore roa te Fatu e haere mai i roto i taua matahiti ra, ei Arii no te ao nei, e muriiti a'era, parau atura oia i te Feia Mo'a i roto i te hoê amuiraa e, e ore Iesu e haere mai, ia tae noa'tu i to'na (to Iosepha) ruhiruhiaraa.

I muri a'e i te reira, i te hoê pô, ite a'era Iosepha, ratou o Vilifora Vudurufa e o Viliadi Ritedi, i te hoê tarava rahi maramarama i roto i te reva, mai te hoê 'o'e rahi i te huru. Ua faaite atura Iosepha ia ratou e, e tapao papu roa ia taua 'o'e ura ra e, e tupu te hoê tama'i rahi roa i Amerika, e muri iti a'era, parau faahou atura oia i taua tohuraa nei, mai te parau e, e haamata taua tama'i rahi ra i te tu-faa fenua ra i Carolina Apatoa.

I te 18 no Me, haere atura Iosepha na roto i te oire ra i Tuinici, e anihia maira oia ia haere i ò ra te fare no Setephano A. Dougalasa e tamaa'i. Ua haere atura Iosepha, e paraparau a'era raua o Dougalasa, haavâ, no nia i te mau hamani-ino-raa i Missouri, e e oti a'era Iosepha i te parauraa'tu ia'na, faahapa puai atura o Dougalasa ia Boga, e i te tahi atu â mau taata toroa, e parau atura oia e, e au roa ratou ia faautuahia. E oti a'era te tamaaraa, parau atura Iosepha i te hoê tohuraa ia Dougalasa, na ô atura, "E haavâ e, e tamata oe i te mau i te toroa peresideni no te hau Amerika, e mai te mea e patoi mai oe i te ohipa no te Feia Mo'a i te Mau Mahana Hopea Nei, e ite ai oe i te teimaha o te rima o te Atua Mana-hope i nia iho ia oe na; e e ora oe ia ite papu i te parau mau o ta'u mau parau, no te mea e haamana'o oe i ta taua paraparauraa i teie nei mahana e tae noa'tu i to oe poheraa." Ua tupu mau teie nei tohuraa, no te mea ua tamata Dougalasa i te mau i te toroa peresideni no te hau Amerika i te matahiti 1860, e patoi noa maira oia i te Feia Mo'a, mai te mana'o e, e faahereherehia oia e te mau taata, a tamata'i oia i te mau i taua toroa rahi ra. Aore roa râ oia i manuia i ta'na tamataraa, no te mea ua vî roa oia ia Aberahama Lincoln, e muri iti a'era, pohe roa ihora oia.

Ua roohia te Peropheta e te peapea rahi i te pae hopea no to'na oraraa, e ua tamata-puai-hia hoi oia e te Atua, no te mea ua heheu maira te Atua ia'na e, ua hinaaro ihora Oia ia rave Ta'na ra mau tavini haapao maitai i te tahi atu â mau vahine, mai te mau patereareha, e te mau taata parautia i te anotau tahito ra. E ravea apî, e te huru ê teie, e feaa rii a'era te Peropheta i te haapao vave. Ua faaroaroa noa oia i te taime e haapao ai i taua faaueraa ra, e fâ ihora te hoê melahi no te Atua ia'na, ma te hoê 'o'e rahi i unuhia maira, e parau maira oia ia'na e, maori râ e haapao ai oia i te faaue ia haapii i taua parau apî ra, e ia faatia i te reira, e rave-ê-hia'tu to'na Authu'araa, e e haamouhia oia.

Aore roa Iosepha i hinaaro i na faaararaa e piti mai te reira i te huru, e haamata vave ihora oia i te haapii atu i te hinaaro o te Atua ia Haeramu, e i te tahi atu â mau taata parau-tia. Ua faaite oia i ta'na vahine ra ia Ema, e i te matamua, hi'o atura oia i te reira mai ta Iosepha i hi'o na, i muri a'era râ, faatia ihora oia ia rave Iosepha i te tahi atu â mau vahine, e horoa'tura oia oia iho ia ratou ia'na ra. Aita Iosepha i hinaaro ia faaite vave atu i taua heheuraa ra i te taatoaraa no te Ekalesia, e aore ia i papaihia ia tae noa atu i te 12 no Tiurai; e hoê ava'e râ i muri iho i te reira, ua taiohia ia e Haeramu Semita i mua i te Apooraa Rahi i Navu. A a'o atu ai Haeramu no nia i teie nei parau no te Evanelia, parau atura oia e, e noaa i te mau taata, o te haapao i teie nei faaue, te Varua no te Atua; te mau taata râ, o te ore e haapao, e moe ia ratou to ratou faaroo, e te mana, e oia mau atura.

I roto i te pae matamua no te matahiti 1843, aita Iosepha i rave i te ohipa no te pae varua ana'e. I maitihia na oia ei tavana oire no Navu, e haapao maitai ihora oia i te ohipa no to'na ra toroa. Ua itoitohia rahi roa oia, e haapao noa ihora i ta'na mau peu faaitoitohia i to'na tino. I roto i teie nei taime, farerei atura oia i te hoê aito rahi i te ohipa taputôraa, o Viliamu Wala to'na i'oa, e taputô hauti maitai noa'tura raua te tahi i te tahi; ua farerei râ Wala i to'na faito mau, no te mea, i te hopea, ua riro te rê ia Iosepha.

I roto i te ava'e ra i Tiunu, ua faatiahia te hoê ravea paari ia faaho'i atu ia Iosepha i Missouri. Ua taparûhia na tavana ra o Renolada, raua o Forada, e tonohia'tura e toopiti mutoi rahi, oia hoi o Renolada no Iaketoni, e o Wilisona no Hanacoka, ia tapea ia'na. Te farerei haere atura te Peropheta i te tahi mau taata i fatata mai i te oire ra i Ditona, a haere mai ai teie nei na mutoi, i faahuru-ê-hia, mai te mea ra e, e na orometua Moromona ia raua. Ua haere mai raua i te fare i parahihia e Iosepha, e parau maira raua e, "Te hinaaro nei maua ia ite ia Iosepha taeae." Ia haere

atura râ Iosepha i te opani, rave ihora raua i ta raua na pupuhitereumu, e parau haamăta'u maira i te taparahi ia'na. Ua parau atura Iosepha ia raua ia pupuhi, no te mea aore oia i măta'u ia pohe, ani atura râ oia ia faaite mai raua i te tahi parau faaueraa no taua tapearaa ra. Aita ta raua e parau, e tairi puai maira raua ia Iosepha i ta raua na pupuhi, e aratô atura ia'na i te pereoo, e tamata raua i te horo ê atu. Ua tapea râ Setephano Makahama i te na puaahorofenua, a hopoi mai ai Ema i to Iosepha pereue e te taupoo. Ua haere atura ratou i te oire ra i Ditona, e a haere atu ai ratou i reira, hamani-ino noa maira raua ia Iosepha, mai te tairi noa mai ia'na i ta raua na pupuhi, e mauui roa ihora oia.

Ua auau atura Makahama ia ratou, na nia i te hoê puaahorofenua, e ua faaite haere oia i tei ravehia i te mau taata. Ua tapeahia teie nei na mutoi e te mutoi rahi ra e Camapela, e ua noaa ia Iosepha te hoê parau faatia ia faaroohia ta'na parau e te hoê pŭpŭ taata no Otowa.

I te mahana i muri iho, haere faahou atura ratou i raro a'e i te mutoi rahi ra, o Camapela, e e pô a'era, faaea ihora ratou i te hoê uru raau, i parauhia "Papau", e i reira ua anihia Iosepha ia a'o atu i te mau taata. Ua ou'a a'era o Renolada i nia, e pii noa maira oia, mai te tamata i te tafiffi ia Iosepha; ua faahapa-puai-hia râ oia e te hoê taata ruau no taua oire ra, e mehameha roa'era, e parahi ihora oia mai te mamû noa. Ua a'o atura Iosepha no nia i te parau faaipoiporaa ia pau roa'e te hoê hora.

I haere na hoi te haavâ ra o Catona, no Otowa, i Niu Ioka, e ua noaa ia Iosepha te hoê parau faatia apî, e ua haamata ratou i te haere atu i Tuinici, ia faaroohia ta Iosepha parau parururaa i mua ia Dougalasa, haavâ. Ua horo oioi atura Setephano Makahama, na nia i ta'na puaahorofenua, i Navu, area a haere atu ai oia i reira, farerei atura oia i e hoê hanere, e hitu ahuru ma pae taata, o tei faaroo e, ua haruhia Iosepha, e te haere noa maira ratou e faaora ia'na.

Ia farerei maira ratou ia Iosepha, oaoa a'era ratou, e ua tahe noa te roi mata. Ua parau atura Iosepha ia Renolada

raua o Wilisona e, "Te mana'o nei au e, e ore au e haere i Missouri i teie nei taime, no te mea o teie hoi ia ta'u mau taata." Mehameha roa'era teie nei na mutoi, no te mea mana'o ihora raua e, e faautua-vave-hia raua; ua parau atura râ Iosepha ia raua e, e ore raua e hamani-ino-hia e te mau taeae.

Ua opua ihora ta Iosepha na haapii ture, e te tahi atu â mau taata, ia haapaohia te haavâraa i Navu, e eita i Tuinici, e ua mauruuru roa Iosepha i te reira. Te imi noa ra te na mutoi i te ravea e tia'i ia raua ia tuu atu ia Iosepha i roto i rima o to'na ra mau enemî, e hinaaro ihora raua ia afai atu ia'na i te muriavai no te anavai ra o Roka, no te mea tei reira hoi te hoê pûpû hoa no raua i te tiaî-noa-raa ia tauturu mai ia raua i taua ohipa ino ra. Aita roa râ Camapela, mutoi rahi, i faatia i te reira, e rave ihora oia i ta raua na pupuhi, ia ore e tia ia raua ia haru, eia afai atu i te Peropheta.

I mua'e i to ratou taeraa'tu i Navu, ua hinaaro te hoê haapii ture no te na mutoi ia taputô i te hoê taata no Iosepha ma, i ta'na iho ravea taputôraa. Ua tamata hauti noa Setephano Makahama i te taputô atu ia'na; ua riro râ te rê i te haapii ture, e tâhitohito noa maira ratou ia Makahama, e i to'na ra mau hoa. Ua parau atura te Peropheta ia Philemona C. Merila, te hoê taata apî, na ô atura: "A tia i nia e taputô atu i tera taata." Aore hoi o Philemona i mâtau i te reira huru taputôraa, aita râ oia i tuu i te otohe-raa, e tia a'era oia, a taputô ai i taua taata ra. Ua parau atura Iosepha e, "Philemona e, ia taio au i te numera toru, a huri atu ia'na." E taiohia a'era te numera toru, huri ohie roa ihora Philemona i te haapii ture i te fenua, e ua maere hoi te mau taata'toa i reira.

E oaoa rahi roa to te Feia Mo'a, ia tae faahou atura Iosepha i Navu, e faatiahia ihora te hoê oroa rahi i te fare no te Peropheta. Tei reira atoa o Renolada raua o Wilisona i te tamaaraa, e farii aroha maira o Ema i teie nei na mutoi, o tei tamata na i te taparahi i ta'na tane, e ua hamani-maitai-hia, mai te mea ra e, e na taata turatura ia raua. Ia haere râ raua, tamata ihora i te faatia i te hoê nuu ia haamou i te oire no te Feia Mo'a, aita râ o Forada, tavana, i faatia. Ua faatiamâhia Iosepha e te haavâraa i Navu, e te huru, ua hope to'na mau peapea.—OLE PETESONA.

(E tuatihia mai teie parau.)

Te Mau Parau Apî.

Ua faaroo matou e, e rave rahi rii te mau poe maitatai i iteahia i teie nei avariraa pârau i te Tuamotu.

Ua pohe a'enei to matou taeae Peresibutero, o Pou a Tetoka, te Peresideni no Taega. I Takume oia i pohe ai, i te 14 no Atete. Mai te au i ta matou i faaroo ra, ua faaaraara mai te taote ia'na, eiaha e hopu i te vahi hohonu; i muri iho, ua hopu ona i te hoê vahi e 18 etaeta, e ia tae mai oia i nia, faaite atura i te hoê tamaiti e, ua mauui oia, ei reira ihora i pohe oia i nia i to'na vaa.

A tere ai te pahi auahi ra o Aorangi, mai Papeete atu i San Francisco, ua mairi i te miti te hoê tamaiti faaanaana veo i nia i te aua no te pahi. Ua ho'i i muri te pahi, mai te imi ia'na, e i na hora e piti i muri iho, ua itea, e ua ora oia. I te tere hopea nei o te pahi auahi ra o Tahiti, ua ou'a te hoê taata i roto i te miti, e ua parauhia e, ua pau oia i te mao. Ua maamaahia oia i te veavea rahi i raro roa i te pahi, i pihaiho i te mau umu rarahi, i te vahi ta'na i rave i te ohipa.

I te 24 no Atete, ua tupu te hoê mea maere rahi roa i Tautira, i Tahiti. I te hora piti, ua mairi maira te ûa paari, e te hiona, e e mea puai roa te mata'i, e te uira, e te patiri. Ua vai noa, e huru maoro, te hiona i nia i te fenua, e ua pohe te raau e te vanila, e aita hoi e maa toe i nia iho i te vanila. No te puai o taua mea ra, ua pohe te moa i te fenua aihere. Tei te fenua aihere te tupuraa o taua mea ra; e 20 minute te maoro, e ua ore roa. Ua papai maira te taata, mai te na ô maira e, "Ua au teie i te anotau o Mose, ta'na i rave i te arii i Aiphiti, a aratai ai oia ia Iseraela, ua tupu atoa te mātā'u, no te mea aita ia ohipa i itea i teie paeau."

I te 4 no Atete, ua tae mai te tavana apî no te mau fenua Farani i Oteania nei. Na nia oia i te pahi Aorangi i te tereraa mai.

I roto i te ava'e Febuare, i te fenua Purutia, ua faarue e 12,000 taata Porosetani i to ratou haapaoraa, e i na hebedoma i muri iho i te reira, ua taiva e 350 taata no taua haapaoraa ra. E rave rahi o taua mau taata taiva ra i farii i te feruriraa o Darwin, oia hoi no roto mai i te urî-taata tatou nei, etc. Ua tupu te faaroo ore rahi roa i taua fenua ra, e ua fiu roa te mau taata i te mau haapaoraa taata. Na te hau te ekalesia i faatere i taua fenua ra.

Te opua nei te hau Beritane ia heru i te hoê purumu i raro a'e i te miti, e tae atu ai i Farani. E mea huru au taua na fenua ra i Tahiti nei e Moorea, e e 20 e tiahapa maile te atea te tahi i te tahi. Ia oti taua purumu i te heruhia, e tere te mau pereoo auahi, e aore râ te mau pereoo uira, mai Beritane e tae roa'tu i Farani. E 24 maile te roa no taua purumu ra, e te moni i mana'ohia e pau, e riro paha ia e 80 milioni dara.

Ua tupu te hoê ati rahi roa i Niu Ioka, i te 22 no Tiurai. Ua tupu te auahi i roto i te hoê fare teitei roa, i haapaohia no te hamaniraa i te piripou parata, etc. Tei roto i taua fare ra e 125 vahine rave ohipa, e tei te maha o te tahua ratou i te raveraa i te ohipa. Ua tupu te auahi i raro a'e i te e'a, e ua pau ihora te e'a, e aore hoi e ravea no taua mau vahine ra. Ua ou'a te tahi pae na roto i te haamaramarama, e ua paruparu roa ia, e pohe roa ihora te tahi pae. Ua huru pau te mau tahua o te fare, e ua mairi i raro te fare taatoa, e ua pohe roa i reira e 40 vahine; te pae rahi o taua mau vahine ra, e mau vahine apî roa ia. Ia oti te auahi i te tinaihia, e te feia tinai auahi i te paumuraa, e te faahiraa i te pape, aore roa te mau tino o taua mau vahine ra i iteahia, maori râ te rehu rii e te ivi paapaa roa.

I roto i Atete, ua faaitehia e, ua tupu te hoê ueueraa fenua i ô Samoa e Tonga. I teie nei, ua roohia taua fenua ra i te o'e. Ua parauhia e, aore roa e maa i reira, maori râ te ufi.

I Niu Zilani, i te 24 no Tiurai, ua pohe roa te hoê tamahine i te hoê pereoo uira. I teie nei, ua tapeahia te taata faatere i taua pereoo i te fare auri no te hara taparahi taata. Ua parauhia e, ua haapao ore oia i te faahoro i taua pereoo uira. Te vai nei i Papeete e rave rahi te pereoo uira i teie nei, e te tahi pae o taua mau taata faahoro i taua pereoo ra, ua haapao ore roa, e te hopea, e pohe te taata. E ere ia te mea tia ia faahoro puai noa ratou i nia i te mau purumu o te oire nei.

Te tere noa nei â te ohipa a te mau vahine faatupu peapea i Beritane, e te rave noa nei â i te ohipa maamaa rahi roa. I te ava'e ra i Tiunu, ua tanina ratou i te auahi i te hoê fare pureraa rahi e te nehenehe, e ua pau roa taua fare ra. Ua na mua ratou i te ninii i te mori arahu i nia i te mau vahi o roto i taua fare ra, ei reira i tutui ai. I te hoê mahana arearea rahi, a faatitiaua te mau puaahorofenua i mua i te Arii e te Arii Vahine, e te hoê putuputuraa rahi roa, ua ou'a te hoê o taua mau vahine ra i mua i te hoê o te mau puaahorofenua faatitiaua, e ua mau oia i te tavaha, pohe roa'tura oia. Ua haatuahia taua vahine ra i te reva o te mau vahine faatupu peapea. Ua parau maira ratou e, eita ratou e faaea i taua huru ohipa ra, ia faatiahia'i ratou ia tuu atoa i ta ratou parau maiti i roto i te mau maitiraa no te hau.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.